

LEE KOK MEMBANGKITKAN PERASAAN UMAT ISLAM

(Oleh Ahmad Lutfi)

Masalah Nadrah yang telah heboh diperbincangkan oleh seluruh dunia itu tentang perkahwinan yang dipandang oleh pihak-pihak yang bukan Islam itu kecil nampaknya telah merebak dengan langkah Tuan Jun Lee Kok seorang peguam dan ahli mesyuarat

Legislative Council Singapura yang telah membawa suatu rang undang-undang ke dalam majlis itu yang bertujuan mengharamkan perkahwinan yang berlaku di antara orang-orang yang berumur di bawah 16 tahun (Masih). Rang undang-undang yang didatangkannya itu adalah untuk umum penduduk di Singapura ini dan oleh yang demikian maka rang undang-undang itu dengan tepatnya, jika disetujukan kelak akan mengenai orang-orang Islam yang telah mempunyai undang-undang yang tetap yang ditaati oleh mereka itu oleh kerana nas-nas tidak ada khilafnya di dalam al-Quran. Rang undang-undang itu sebagaimana yang tersiar terjemahannya demikian:-

1. Undang-undang ini hendaklah digelarkan “Undang Umur-umur Perkahwinan Tahun 1950”.
2. (1) Sesuatu perkahwinan antara dua orang yang seseorang daripadanya di bawah umur 16 tahun adalah akan tiada sah:-

Dengan syarat bahawa di dalam sebarang perbicaraan ke atas seseorang yang dituduh di bawah Seksyen 354 atau Seksyen 355 daripada Fail Kod (kif. 20) adalah akan jadi suatu pembelaan yang mencukupi bagi membuktikan bahawa pada masa manakala kesalahan itu dikatakan telah dilakukan ia (si laki) ada sebab yang berpatutan bagi mempercayai bahawa perempuan yang dikatakan ia telah melakukan kesalahan ke atasnya itu ialah isterinya.

- (2) Tiadalah apa-apa di dalam undang-undang ini boleh menyentuh

sebarang perkahwinan yang telah diakadkan atau dijalankan sebelum daripada diluluskan undang-undang ini, dan sebarang perkahwinan yang sebegini rawak adalah akan jadi sah di dalam sebarang perkaranya iaitu jika undang-undang ini telah diluluskan, ia jadilah sah.

(3) Seseorang perempuan bujang yang telah melahirkan seseorang anak, dengan bukti bahawa sebelum daripada kelahiran anak itu ia adalah jadi suatu pihak kepadanya yang disebutkan adalah perkahwinan yang sah jika tidak kerana kelulusan undang-undang ini dan bahawasanya pihak yang satu lagi yang demikian dapatlah bertemu dengannya dalam tempoh 12 bulan sebelum daripada kelahiran anak itu, bolehlah pada sebarang masa membuat permintaan di bawah Seksyen 37 Sub Seksyen 3 daripada Undang-undang Kesalahan Kecil (kif 24) sekianlah bunyinya rang undang-undang tersebut.

Apabila terhebat sahaja di dalam akhbar-akhbar tentang perkahwinan di bawah umur (mengikut faham-faham orang bukan Islam itu) maka dengan malangnya sebahagian daripada mereka-mereka yang nampaknya menghendaki dakyah atas darinya lalu mengambil peluang itu dengan tidak berfikir pandang membuat perasaan hatinya menyokong langkah yang bakal menoda kepada undang-undang agama, yakni jika diluluskan rang undang-undang Jun Lee Kok itu. Ada juga pihak kaum ibu yang berkaitan dengan pertubuhan yang ditubuhkannya sendiri dengan tidak mengetahui selok-belok hal ehwal agama lalu menyokong bulat-bulat kepada rancangan Jun Lee Kok itu yang sudah tentu akan menganiaya kanun agama Islam yang kuat yang bukannya dibuat oleh manusia tetapi kanun yang ditetapkan oleh Allah Subhanahu wa Taala yang tidak seorang pun boleh mengetahui dan manusia tentang perihal yang

terkandung atau terlingkung kepada barang yang dikanunkannya itu.


Allah telah menetapkan bahawa seseorang anak perempuan yang baharu zahir itu sah boleh dikahwinkan oleh walinya kepada sesiapa pun yang difikirkannya layak atau yang disukainya. Yang demikian ini dicontohkan oleh Rasulullah (SAW) sendiri Di dalam perkahwinannya dengan Saidatina Aisyah dalam masa belum haid lagi. Tidak ada seorang daripada orang Islam yang dapat menafikan sahnya perkawinan seorang perempuan yang masih kanak-kanak itu oleh kerana ia telah melakukan yang demikian itu pada hal tiap-tiap perbuatan Nabi itu adalah sebagai contoh dan ikutan umat-umatnya. Jika suami bagi si kanak-kanak yang dikahwinkan itu mati maka isteri itu berhak ke atas pusaka suaminya. Tetapi kahwin yang semacam ini sebelum lagi dihaul atasnya maka perempuan itu tidak wajib diberi nafkah dan nafkah itu diberi apabila kanak-kanak itu sudah baligh maka jika ia sihat badannya dan tidak menjadi mudarat bahanarulah boleh disatukan kepada suaminya tadi dan dengan watinya itu bahanarulah wajib nafkah di atasnya.

Yang di atas ini ialah perkara nikah gantung. Perkara yang kita hadap sekarang ialah tentang menetapkan umur itu. Banyak penulis-penulis telah menulis menerangkan tentang sempadan-sempadan sah perkahwinan di antara seseorang perempuan yang baligh dengan lelaki itu membahagikan sempadannya tiga bahagian (1) jika ia bermimpi bersetubuh dan inzal, (2) datang haid dan (3) jika tidak ada tanda-tanda yang demikian digenapkan umurnya 15 tahun iaitu masa selambat-lambatnya seseorang perempuan datang haid itu. Tiga ketetapan ini sebagai ini sebagai tanda-tandanya itu adalah menunjukkan bahawa perempuan yang telah menerima dan sampai kepada perkara yang tersebut itu di dalam hukum Islam terkenalah kepada mereka segala tanggungan-tanggungan yang diletakkan kepada tiap-tiap seseorang dan dengan adanya tanda-tanda itu dengan sah dan terangnya gugurlah tanggungjawab ibu bapanya

ke atasnya yang menunjukkan mereka itu telah dewasa dan mempunyai tanggungan-tanggungan yang tertentu sebagaimana keadaan orang lain. Ia bebas di dalam segala-galanya dan menurut khaul yang berpegang kepada asas al-Quran dan al-Hadith sahaja bahawa jika perempuan itu ada walinya sekalipun ia boleh berkahwin dengan memilih kepada sesiapa yang disukainya dengan bertahkim dengan sebab ia telah bebas atau dewasa untuk memilih apa yang difikir baik bagi dirinya. Menurut khaul ini perbuatan berwali bapa dan seterusnya itu sebagaimana yang lazim bukanlah ia syarat sah nikah tetapi yang demikian hanya sunat juar.

Di dalam menetapkan umur itu adalah bersalahan sama sekali dengan pengajaran-pengajaran Islam jika orang-orang menghalusi dengan saksama tentang sebab-sebabnya tidak ditetapkan umur itu ialah oleh kerana di dalam kejadian-kejadian manusia itu yang berlainan tempatnya kesuburan badan seseorang itu tidak sama. Seseorang yang hendak di dalam negeri panas keadaan tidak sama dengan orang-orang yang hidup di dalam negeri-negeri yang sejuk. Pembawaan itu tidak menentukan kepada umur-umur yang terhad tetapi membawa kepada kekuatan badan yang demikian seseorang perempuan itu keadaannya lebih tegap pada suatu tempat dan umurnya masih rendah serta datang haid tetapi pada tempat yang lain umurnya telah tinggi tetapi ia tidak datang haid sebab badannya tidak subur. Dengan demikian maka nampak bahawa ketetapan pada umur itu tidak dapat dijalankan oleh kerana perbezaan hawa dan sebagainya dan di sini nampaklah kebijaksanaan Allah yang Maha Bijaksana itu yang menetapkan hukum yang tidak terupa pada akal manusia meletakkannya.

Di sebalik itu hendaklah kita ketahui hukum ini adanya bagi menentukan sekurang-kurang perbuatan yang boleh dihimpunkan di antara seseorang perempuan dengan lelaki dengan jalan yang halal. Daripadanya dapat kita fikirkan lain-lain sebab iaitu telah lazim kepada kejadian tabii bagi mereka-mereka



"Semulia-mulia kematian bagi seseorang Islam itu ialah kematian di dalam membela agama Allah" – kata as-Syed Ahmad Dahlal al-Husaini penyayarah Jamiah di radio yang terkenal di dalam ucapan di perjumpaan umum orang Islam masjid Sultan kerana membantah cadangan Jun Lee Kok - Gambar Qalam.

yang baharu sampai kepada sempadan baligh tadi (sama ada lelaki atau perempuan) adalah mereka menghadapi suatu pencaroba kehidupan yang dengan ringkasnya masa itu tiba percubaan kepada diri mereka itu dengan kongkongan syahwat yang akan membawa mudharat kepada mereka jika mereka mengikutnya. Oleh yang demikian diberi suatu jalan kepada mereka-mereka yang barangkali tidak kuat menahan kemahuan tabiinya itu boleh berkahwin dalam sempadan yang tersebut dengan dikhaul sekali dengan syarat bahawa keadaan kedua-dua mereka itu sihat, juga walaupun perempuan itu berumur 30 tahun atau 35 tahun kalau ia tidak sihat maka tidak boleh berhimpun ia dengan suaminya dan suami wajib memberi naafkah kepadanya – jadi tidak payah lagi untuk menetapkan umur kerana yang demikian itu sudah tersurat dengan terangnya

di dalam syariat. Dengan ini tidak payah kita berkata mengikut Mesir dan sebagainya kerana hukum-hukum kerajaan Mesir itu bukannya hukum Islam yang muktamad.

Tetapi di sana tidak ada satu tegahan yang menetapkan bahawa di atas daripada umur-umur yang tersebut orang-orang tidak boleh berkahwin. Oleh yang demikian maka kelapangan-kelapangan yang diberi oleh agama itu hendaklah digunakan oleh kerana di dalamnya ada meliputi perkara-perkara kecualian yang harus terjadi. Dengan ini Islam telah memulangkan kebijaksanaan kepada tubuh tiap-tiap seseorang itu meletakkan kehendaknya – jika ia boleh berkuasa menjauhi perkerjaan-pekerjaan yang menggodanya sehingga berbuat kepada perbuatan-perbuatan zina maka yang demikian menjadi suatu pahala tetapi sekiranya orang itu tiada kuasa bertahan dan tidak berupaya menjauhkan kehendak-kehendak tabiinya dengan sebab baligh itu maka diluluskan bagi mereka itu berkahwin dan dikhaul supaya terlepas daripada bencana itu. Dengan ini zahir menurut pendapat saya tidak ada satu pun undang-undang yang lebih baik daripada undang-undang Islam yang disusun oleh Allah itu dengan tidak payah mencontoh kepada negeri ini dan negeri itu kerana ia telah tertulis dengan terangnya di dalam al-Quran dan ingat sesiapa yang telah mengaku dirinya beriman dengan al-Quran mencacat atau mencela kepada hukum-hukum yang tersebut maka bermaknalah ia mencacat dan mencela hukum Allah dan berlindunglah kita daripada yang demikian itu.

Dengan ini maka orang undang-undang yang dibawa oleh Jun Lee Kok itu jika mengenai kepada orang-orang Islam dan jika disahkan bermakna mencacatkan undang-undang hukum yang tidak boleh diubah oleh orang-orang Islam maka yang demikian itu bermakna Jun Lee Kok menghendaki supaya orang-orang Islam itu dipaksa di bawah kanun negeri ini mengubah barang yang tidak boleh diubah olehnya. Oleh yang demikian itu di mana-mana tempat langkah itu sudah tetap dibantah oleh mereka-mereka yang beriman dengan Islam – bukannya oleh mereka-mereka yang menggunakan Islam

untuk topeng bagi kemegahan diri atau untuk muslihat diri yang dihajatnya berbuat dengan berselindung dalam nama persekutuan atau pertubuhan yang kononnya untuk kebajikan orang-orang Melayu yang beragama Islam.

Selain daripada itu ada pula yang berani berkata di antaranya Cik Zaharah binti Nur Muhammad yang kita percaya tidak sedikit pun berpengetahuan dalam hukum-hukum agama Islam dengan berani telah mengatakan bahawa oleh kerana orang Islam telah banyak melanggar hukum-hukum agama maka tidaklah payah lagi kita mengikut hukum-hukum yang telah ditetapkan di dalam perkahwinan itu. Perkataan yang demikian tampaknya dengan terang mengajak orang lain sebagaimana juga nampaknya ia harus biasa membuatnya, supaya memudahkan perkara-perkara hukum Islam dan dengan mudah pula mencampak mencela kepada sesuatu rancangan yang sah tersurat di dalam al-Quran. Adakah Cik Zaharah berpendapat bahawa kalau ia gemar melanggar hukum yang tersurat dengan terangnya di dalam al-Quran, tiada khilafnya, itu orang lain mesti mengikuti fahamannya supaya melanggar hukum-hukum yang tersebut? Adakah Cik Zaharah berpendapat bahawa jika ia umpamanya berbuat perkerjaan-perkerjaan yang asi dan orang lain mesti mengikut langkah membuat perkerjaan yang asi yang melanggar hukum-hukum agama itu umpamanya mengadakan dancing (menari) di rumah sendiri?! Sebenarnya orang yang sedemikian ini menurut pendapat kita tidak boleh diterima sama sekali fikirannya dan tidak boleh dilayan dan bolehlah disifatkan orang yang seperti ini cuba mengeruh dan memecahkan orang Islam di negeri ini.

Saya mengetahui bahawa sedangkan perkahwinan Rasulullah (SAW) dengan Saidatina Aisyah itu telah dicela oleh setengah-setengah ahli tawarikh dengan mengatakan perkahwinan itu adalah perkahwinan kepada kanak-kanak

yang belum cukup umur dan yang dengannya menggalakkan tiap-tiap orang Islam supaya berkahwin muda. Sangkaan-sangkaan yang demikian ini adalah salah sama sekali dan berlawanan dengan asas-asas pengajaran-pengajaran Islam oleh kerana perkahwinan yang dijalankan oleh Rasulullah dengan Saiditina Aisyah adalah perkahwinan berlainan dengan keadaan yang bebas oleh sebab jiwa Saidatina Aisyah itu adalah jiwa yang tinggi yang dengan perkahwinan itu dapat ia menjadikan soal punca perawi-perawi hadith yang menjadi tumpuan kepada tiap-tiap orang Islam kemudiannya mengetahui tentang riwayat-riwayat hadith. Selain daripada ini di sana didatangkan contoh-contoh kehidupan yang patut menjadi panduan umatnya bagaimana cara pergaulan-pergaulan yang tersembunyi di dalamnya beberapa hikmah-hikmah dan kepayahan-kepayahan yang patut menjadi gambaran kepada tiap-tiap seorang.

Tiap-tiap seorang yang meneladani perkara-perkara yang tersebut ini tak dapat tiada mengetahui apa ertinya kehidupan orang yang berkahwin muda dan bagaimana mesti berlaku adil kepada isterinya yang masih muda dan demikian juga di dalam riwayat hidupnya bagaimana Rasulullah (SAW) telah berkahwin dengan orang yang berumur 35 tahun yang semuanya itu menjadi



Sebahagian daripada mereka-mereka yang hadir di dalam perjumpaan umum orang Islam di Masjid Sultan pada 1 September 1950 kerana membantah rang undang-undang perkahwinan yang dibawa oleh Jun Lee Kok - Gambar Qalam.

contoh bagi kehidupan tiap-tiap seorang supaya berlaku adil di antara satu dengan lain serta menunjukkan timbang rasa-timbang rasa yang di dalamnya wajib diikut kepada mereka-mereka yang taat atas hukum-hukum yang telah diperundangkan-undangkannya bukannya oleh mereka-mereka yang sememangnya mencari jalan untuk melanggar atau memudahkan hukum-hukum yang tersebut itu demikianlah perkara ini tidaklah hendaknya dijadikan hujat oleh kerana orang Islam bertahan atas hukum-hukum agamanya itu bermakna orang-orang Islam lebih gemar kepada perkahwinan yang muda (yang dikatakan di bawah umur) tetapi yang demikian itu ialah kerana ada kelulusan yang mesti diikut mereka. Juga di dalam pergaulan orang Islam zahir nampaknya jarang-jarang sekali orang yang baharu baligh itu dikahwinkan. Patut juga kita nyatakan bahawa orang yang mempertahankan kahwin kepada “cukup umur” mengikut tahun-tahun yang ditetapkan itu kita dapati banyak yang telah rosak gadisnya sebelum ia berkahwin cukup umur itu dan adakah perbuatan yang demikian ini digemari. Jawabnya terpulang kepada pembaca-pembaca.

Tetapi Alhamdulillah orang Islam nampaknya telah menyedari perkara-perkara yang tersebut iaitu apabila tersiar sahaja tujuan-tujuan Jun Lee Kok itu yang menyalahi peraturan agama maka mereka-mereka yang fikiran dan pengetahuan boleh digunakan telah membantah dengan hebatnya kepada rang undang-undang yang tersebut dan dengan demikian maka ternyata dalam akhbar pada 8 September 1950 mengatakan bahawa Tuan Jun Lee Kok yang membawa rang undang-undang itu telah meminda rancangan dengan mengecualikan orang-orang Islam ke dalam undang-undang yang tersebut. Dengan isytihar ini bermakna bahawa Jun Lee Kok telah insaf dan mengetahui bahawa langkah itu adalah diharamkan oleh orang-orang Islam yang mengetahui hukum-hukumnya, bukannya seperti fikiran Cik Zahrah binti Nur Muhammad yang cuba memandai-mandai kepada barang yang tidak diketahuinya dan dengan pindaan yang bermakna perkara yang harus membawa ketiadaan puashati itu telah berubah menjadi perkara ketenangan yang bermakna menjauhi daripada perselisihan yang mesti dibela dan dipertahankan oleh umat Islam adanya.



Sebahagian daripada ahli-ahli jawatankuasa yang telah dilantik di dalam perjumpaan umum di Masjid Sultan pada 1 September 1950 di dalam persidangan yang pertama di rumah Jamiah al-Dakwah al-Islamiah sedang merundingkan bantahan rang undang-undang Jun Lee Kok yang telah dipindanya itu -Gambar Qalam.